

DE  
N A T U R A  
MUSCULORUM,  
PRÆLECTIONES

TRES,

IN

THEATRO COLLEGII MEDICORUM  
LONDINENSIIUM  
HABITÆ.


A THOMA LAWRENCE, M. D.  
COLLEGII ejusdem SOCIO.

LONDINI:

Prostant venales apud JOHANNEM WHISTON  
et BENJ. WHITE in Fleet-street.


M.DCC.LIX.





## PRÆLECTIONUM ARGUMENTA.

### *Argumentum Prælectionis Primæ.*

	AUSA cur a multis reprehendatur	
	Medicina rationalis	Pag. 1
	Causæ cur inter se medici rationales	
	dissentiant	2
	Naturæ animalis bipartita divisio	3
	Principii moventis ratio maxime habenda	ibid.
	Cronii institutum	5
	Prælectoris propositum	6
	Qualis definitio in rerum naturis explicandis	
	optima	8
	Unde musculi nomen	ibid.
	Musculi definitio	9
		Mus.

*Prælectionum Argumenta.*

Musculi partes	p. 9
Musculorum Origines et Caudæ inter se commu- tabiles esse	ibid.
Musculi Venter	11
Musculi Membrana	12
Musculi Membranæ usus	13
Restitutio membranæ pure exesæ	14
Quemadmodum Fila musculorum inter se con- nectantur	16
Causa doloris in Spasmo $\phi\upsilon\sigma\acute{\omega}\delta\epsilon\iota$	17
Duplex Spasmus $\phi\upsilon\sigma\acute{\omega}\delta\eta\varsigma$	ibid.
Qualia fila musculosa in ætate, sexu, musculis diversis esse soleant	18
Unde Morbus Rhachitis, et Strumæ	20
Eorundem morborum curatio	21
Quid intersit inter fila musculosa, et ea fila ex quibus media Arteriarum membrana constat	ibid.
Quid intersit inter Tendines, Nervos et Liga- menta secundum Hippocratem et Galenum	23
Tendinis Natura, fabrica et usus	25
Tendinum Capsulæ	26
Alii Tendinum usus	27

*Argumentum*



## *Prælectionum Argumenta.*

### *Argumentum Prælectionis Secundæ.*

Qualis Medicina vetus	p. 29
Quid in medicina excolenda fecere recentiores	31
Vasorum animalium contemplatio	32
De vasis musculorum	36
Musculorum Arteriæ	ibid.
Musculorum Venæ	38
Vasa musculorum arteriis et venis exiliora	ibid.
De loco quo vasa musculos ingrediuntur	39
Quemadmodum vasa filis musculosis dividantur	42
Vasorum conjunctiones	ibid.
De Ufu vasorum in musculis	43
De Nervis Musculorum	44
De Formis Musculorum	45
Musculus rectus	ibid.
Musculi recti usus	46
Musculi penniformis, descriptio et usus	ibid.
Vis musculosæ plurimas esse causas	47
Musculus penniformis duplex	48
Multiplex	49
Musculi bicipites et tricipites	ibid.
	Mus-

## *Prælectionum Argumenta.*

Musculi caudas multiplices habentes	p. 50
Musculorum caudas multiplices habentium usus	ibid.
Musculi Sphincteres	51
An Musculi Sphincteres in orbem revera ducantur	ibid.
Quemadmodum fila musculosa in orbem ducta foramen comprehensum claudere possint	52
Quemadmodum fila Cordis musculosa sanguinem ejusdem cavis receptum expellant	52
De loco quo musculi infigi solent	53
De Musculorum apta collocaione	ibid.

## *Argumentum Prælectionis Tertiæ.*

De musculorum actione sive contractione	56
Sententia Borellii de causa motus musculorum	57
Sententia Bernoullii	60
Sententia Cronii qui Borellio et Bernoulio facem præluxit	62
Couperi sententia et experimenta	64
Quæ Couperi sententiæ opponi possint	65
Conjecturæ Prælectoris de causa motus muscu- lorum	67
	Quid

*Prælectionum Argumenta.*

Quid nervi faciant in musculis movendis	p. 69
De motus muscutorum causa prima et efficiente	74
De muscutorum contractione naturali	75
De muscutorum contractione <i>instrumentali</i>	ibid.
De muscutorum motibus voluntatis imperio sub- jectis	76
De muscutorum motibus iis qui nobis invitis fiunt	ibid.
De motu muscutorum spirationi inservientium	81



## ERRATA.

Pag. 21, line 11, effætam, *leg.* effoetam. p. 33, lin. 18, extrema, *l.* principia. p. 53, l. 9, prima, *l.* priore. p. 61, l. 11, existente, *l.* existenti. p. 66, l. 16, motum, *l.* notum. p. 71, l. 3. postulent, *l.* postularent. p. 71, l. 18, remissum, *l.* remissam. p. 75, l. 10, viventibus *l.* in-viventibus. p. 82, l. 2. nunc, *leg.* hunc.





# DE NATURA MUSCULORUM.

## Prælectio Prima.

**H**AUD levis profecto, Auditores, est illa reprehensio, qua in medicinam rationalem invadi solere a permultis video : Medicos scilicet ex hac disciplina doctissimos tanta in varietate et dissensione esse constitutos, ut eorum molestum sit dinumerare sententias : Nec cuinam harum sententiarum adsentiatur prudentem posse deligere ; ita sunt in omnibus non rationum, sed conjectu-  

B
rarum

rarum paria momenta. Hinc fit, ut plerique eorum, qui nec a naturæ studio abhorrent, et qui medicinæ rationalis excellentiam atque præstantiam, si modo rebus ipsis, non ingenii commentis innitatur, libenter agnoscunt, Physicorum vana atque ficta principia respuentes, et Geometrarum, qui in medicorum possessionem quasi vacuum involarunt, portentis territi, Empiricorum rivulos confectentur, fontesque uberiores prætereant unde universa medicina deducatur.

Equidem, cum contemplor animo, præter summam rerum in arte medica obscuritatem, aliam hujus nostræ calamitatis causam reperio, ineptam scilicet medicinæ excolendæ rationem; in principiis ponendis quidlibet fingendi audaciam, in præceptis deducendis similitudines et rationes a rebus medicis alienas. Quod



Quod si medicinæ cultores illi, qui sese totos colligendis observationibus (quarum numero obruimur) ad-dixere, in iisdem et deligendis, et ordine lucidiore digerendis, diligenter sese præstitissent, næ illi, qui abditas morborum causas exponendas, et ex iisdem certam medendi rationem deducendam susceperere, medicinam longe magis absolutam jam-judum nobis tradidissent.

Naturam autem animalium in partes duas dividi posse censeo, quarum altera est movens, altera seipsam movendam quasi præbet. Prior est vis effectrix omnium quæ fiunt in corpore, posterior quasi instrumentum priori subjicitur.

Quod ad priorem attinet, cum ejus sit motum omnem instituere, incitare, retardare, sistere, omni denique modo

#### 4 DE NATURA MUSCULORUM.

modo moderari; cumque debito motus moderamini, altera illa pars, quæ corpus animantis dicitur, non solum conservationem suam, sed etiam primam constructionem, et restitutionem, si quo casu illa labefactata aut debilitata fuerit, debeat; primum et maximum in medicina, mea quidem sententia, est, prioris illius vim, modos, fines, instrumenta denique intelligere atque respicere; cum ex his solis tota animalis vitæ ratio, et, quod sequitur, medicina rationalis pendeat.

Licet enim maxima in alimentis, aliisque, quæ in corpus ingeruntur, vis insit, vel in conservando vel in perturbando corporis statu; cum tamen alimenta in corporis naturam ea maxime causa vertantur, quod apto motu earum partium, quibus concoquendi et digerendi munus a natura datur, solvantur, cum  
humor-



humoribus intestinis misceantur, alibilisque succus, exclusa fæce, in sanguinis vasa recipiatur; cumque illa ipsa perturbatio, ut videtur, quæ a diæta insalubri, vel etiam a veneno hausto in homine concitatur, five febris, five alia, sit revera motus ex naturæ plerumque instituto auctus, præsentibusque rebus maxime accommodatus; hoc siquidem motu hostem intestinum vel opprimere, vel expellere aggreditur natura; causas, fines, modos motuum animalium medico maxime respiciendos esse nemo prudens negaverit.

Hoc vidit CRONIUS noster, vir cum in cæteris rebus Physicis medicisque versatus et exercitatus, tum in musculis humani corporis perscrutandis et exponendis diligentissimus, qui, ut studium hujus partis Physiologiæ quam maxime prope-

raret,

## 6 DE NATURA MUSCULORUM.

raret, honestis præmiis Prælectori propositis, animalium motuum rationem prælectionibus annuis, in quibus Musculorum natura, vel Cerebri fabrica, Nervorumque inde productorum distributiones et usus exponerentur, illustrari voluit.

Cum id igitur officii Collegii hortatu suscepèrim, ut, ex instituto CRONII doctissimi, causas et instrumenta motuum animalium explicem, non melius eo munere fungi me posse puto, quam si hisce prælectionibus, explorata musculorum fabrica communi, eorumque natura, partibus, variisque formis expositis, ea tandem de motu eorum in universum tradidero, quæ mihi ex observatione et experimentis verisimilia videantur; ita tamen, ut in hac re perobscura atque difficili, multa præterea esse inquirenda, et ea quæ ipse



ipse proferam futuris experimentis excutienda, quibus aut confirmentur, aut refellantur, censeam.

Naturam musculorum exponenti, primum quid sit musculus, et quibus notis a cæteris animantis partibus dignoscatur definiendum est: Non tamen arctiore illo definiendi modo, quem Dialecticos sibi præscripsisse video, quo nempe cujusque rei genere, et differentia qua species a specie distat, breviter et acute expressis, rem quasi suis finibus terminant & circumscribunt, sed laxiore quadam descriptione; quandoquidem in rebus physicis explicandis, imago, rudis licet et inchoata sit, vivida tamen nostris sensibus tradita atque impressa, rem plerumque explicatiorem ponit, quam qualitates ab intima rei natura petitæ, ab oculis vero nostris remotæ. Nec in rerum  
naturis

## 8 DE NATURA MUSCULORUM.

naturis exponendis earundem definitiones ab usu et fine petendas censeo : in omni quippe disciplina philosophica instituenda, prius quid res sit, quam usus, cui inservit, ut intelligatur agendum est : præsertim cum de rebus ipsis plerumque constet, de earum autem usu et fine sæpissime oriatur contentio.

Verisimile quidem videtur animalium musculos sacerdotibus primum innotuisse; his siquidem, cum Deo sacra facerent, et a mactatis hostiis cutem detraherent, nullo modo latere potuit, externus musculorum ordo. Nec vobis fortasse durum videbitur si nomen musculi, græce *μῦς*, a *μύειν* ductum censeam, a motu nimirum illo tremulo et connivente, quo caro tenuis et rubella sub cute extensa in bestiis recens mactatis convulsa rapi solet.

Omnem



Omnem sub cute carnem, ex collectis filorum quasi fasciculis, communi membrana conclusis, certoque ordine positis constantem; adipe atque membrana reticulata inter quosque filorum ordines intercedentibus distinctam; colore in animalibus sanguinolentis rubram; communi nomine medici musculosam appellant.

Musculi autem partes vulgo numerantur tres; quarum duæ sunt musculi fines quibus corporis locis e regione positis affigitur; tertia musculum ipsum constituit. Harum partium ea quæ cum corporis parte minus mobili connectitur, caput vel origo musculi dicitur; ea autem, quæ parti mobiliori affigitur, appellatur cauda.

Nequid tamen ambigui, in his  
C musculi

musculi partibus a se invicem distinguendis, vel quid erroris, in usu proprio cuique musculo tribuendo, oriatur, diligenter animadvertendum est, motum vel gestum corporis raro ope singuli cujuscunque musculi peragi ; sed in omni fere actione edenda vires musculorum complurium conspirare ; dum ex musculis simul agentibus, alii motum dirigant, alii eundem moderentur, alii partem movendam moveant. Quinetiam vis externa sæpenumero efficit ut motus ille qui specie simplex videatur, revera compositis viribus peragatur.

Exemplo res fiet clarior. In capite et collo prorsum movendis, musculi Mastoïdei, simul cum illis qui collo flectendo inserviunt, caput prorsum movent, dum Splenii, Complexi, Recti capitis posteriores, una  
cum



## DE NATURA MUSCULORUM. II

cum Spinalibus et Interfpinalibus colli, motum moderantur, ne nimis præceps fiat.

In vario præterea corporis gestu capita et caudæ musculorum inter se invicem commutantur; quod in musculis abdominis Rectis conspicimus, quippe qui vel sternum deprimere in aëre expirando, vel, corpore supino, pubem versus sternum adducere possunt.

Postremo, quid vis externa in musculorum actionibus mutandis valeat perspicuum est, cum quis funem demissum manibus arripiens murum vel navem ascendere conatur.

Fila illa carnea rubra in fasciculos composita, quæ duobus muscoli extremis interjacent, venter muscoli dicuntur, sive a similitudine nomen  
C 2 ductum

ductum sit, five qua alia ab origine, parum refert ad nostrum institutum : hic loci sufficiat notasse carnem illam musculum ipsum constituere, et in intima fabrica filorum ejus rationem mechanicam motus musculorum esse quærendam.

Omnis musculus propriam suam membranam habet, quæ ex vesiculis oleo plenis, filisque, retis ad formam contextis, constat, fasciculosque musculosos circumjecta hisce quasi integumentum commune præbet. Quin et eadem membrana producta, et inter quosque fasciculos progressa singuli fasciculi laxo nexu cum fasciculis sibi proximis colligantur. Ex oleo autem, per ejusdem membranæ vesiculas sensim exfudante, et cum lymphâ tenui commixto, conficitur mucus ille lubricus, quo oblita atque inuncta fila musculosa, mollia,



mollia, flexilia, omni suo muneri obeundo apta conservantur.

Eadem etiam membrana pingui et reticulata inter musculos interjecta, non solum, mollissimo quasi pulvino interposito, a natura cautum est ne molesto pondere musculis incumbant muscoli; fotuque oleoso et leniente ne nimis arescant, ne nimis tendantur provisum; sed etiam motibus eorum propriis et distinctis obeundis mira fane solertia consultum.

Qui enim fieri potuit, ut musculi plures juxta se positi, alii obliqui, alii transversi aliis incumbentes, vel simul, vel figillatim sine incommodo se contraherent (siquidem contractio est proprius musculi motus) nisi membranæ inter quosque musculos intercedentis, ad eosque adhærentis

#### 14 DE NATURA MUSCULORUM.

rentis textura laxa et reticulata pateretur ut in diversas partes facile non solum sine membranæ hujus ruptione, sed etiam sine tensione molesta traherentur.

Et hic quidem loci, (quandoquidem *Anatomice* ad morbos et ad medicinam referri debeat) minime silentio premenda videtur naturæ vis illa incredibilis, qua vinculum hoc commune musculorum morbo vel corruptum vel destructum restituitur, Neminem quidem fugit, nisi in rebus medicis plane hospes sit, materiam purulentam, post factam in locis musculosis suppurationem, in hanc membranam pinguem et laxam tensione partium circumpositarum detrudi solere; quam, a pure incumbente, tam sua sponte, quam calore corporis indies acriore facto, adeo exesam in ægro quodam memini, ut, abscessu sanato, musculi



musculi arctissime sibi invicem cohærescerent, omnisque motus liberior in scapula, sub qua pus collectum fuisset, movenda, atque adeo in brachio attollendo periret : attamen tempore progrediente, conatibus brachii attollendi indies repetitis, fila membranæ reticulatæ in pristinam longitudinem sensim producta fuisse adeo, ut tandem nullus motus in brachio desideraretur.

Hujus historiæ consimilem aliam historiam apud Glandorpium legimus. Scilicet cum juveni cuidam paronychiam in pollice male curatam suppurationes multæ secutæ essent, aliæ in vola manus, aliæ in carpo, aliæ inter musculos ossibus cubiti incumbentes obortæ ; eo res tandem deducta est, ut sanatis suppurationibus, brachii atque manus movendæ facultas periret, nimirum propter exesam  
et

## 16 DE NATURA MUSCULORUM.

et destructam membranam inter musculos harum partium intercedentem : quæ tamen facultas, adhibitis fomentis, brevi rediit, exitum morbi felicem Glandorpio admirante.

Musculum ex filorum carneorum fasciculis membrana reticulata pingui involutis et sibi invicem nexis constare dixi. In hoc autem nexu id quidem notandum est ; eum nempe in musculis, quorum fila recta et parallela a capite musculi versus ejusdem caudam feruntur, arctiorem esse, quam in iis, quorum fila a locis disjunctis orta ad punctum quasi vergunt. In hac enim musculorum specie, siue conjunctim siue figillatim fasciculi contrahantur, eorum compositione et nexu laxiore omnino opus est, ne agente musculo, distractisque a se invicem fasciculis, eorundem vincula paulo arctiora lacerentur.

Nec



Nec cuiquam dubium esse potest, quin ejusdem musculi alii fasciculi contrahi quiescentibus aliis possint, qui actiones musculorum caudam multiplicem habentium animadvertit : singulis enim caudis singulæ partes dantur, quod in musculis digitos flectentibus, ut alios omittam, perspicuum est.

Nec aliunde causa petenda videtur doloris musculos quasi lacerantis, qui in morbo illo spastico, quem *σπασμὸν φυσώδεα* dicunt, nunc suram, nunc pedis pollicem expergiscentium corripiente exoritur, quam a laceratis et distractis fasciculorum vinculis, dum aliis fasciculis quiescentibus alii convulsione corripiuntur.

Ne tamen minus intellectus aliud sentiens aliud dicere videar, omnino animadvertendum est duo esse *σπασμῶδες* genera quæ loco potius quam

re differunt; nunc enim totus musculus convulsione distenditur, et homo de summo dolore quasi tendinis distracti queritur, nunc autem, parte musculi altera contracta, altera quiescente, distentis et dilaceratis filis fasciculos musculosos sibi invicem connectentibus, musculus ipse, non tendo distrahi videtur.

Aliud de membrana connectente, unde digressa est oratio dicendum restat, illam nimirum non solum fasciculos musculosos, verum etiam eorundem fila simplicissima et tenuissima inter se colligare: quod plane conspiciet quisquis musculum aqua frigida maceratum, vel ferventi coctum manu suspensa transverse distraxerit.

Musculus a musculo non solum texturæ ratione differt, quod in alio arctius, in alio laxius fasciculi sibi invicem ad-

nec-



nectantur, sed robore et magnitudine, ut ego quidem suspicor, filorum musculorum. In musculis enim infantum tenuiora et flexiliora sunt fila, quam in musculis eorum quorum ætas jam adolevit; quinetiam in eodem animante, et in eadem ætate alius admodum in aliis musculis reperitur status; siquidem linguæ atque cordis stamina musculosa omnium musculorum aliorum stamina tenuitate et teneritudine facile vincere cuivis hæc cum illis conferenti perspicuum erit; quam quidem mollitiem et tenuitatem ea maxime de causa filis linguæ musculosis naturam dedisse verisimile est, ut linguæ formæ mutabili, quin et fortasse acriori saporum sensui prospiceretur melius. Vitæ vero curriculum, ut ut exiguum nobis præstitutum sit, id certe postulasse videtur ut cordis stamina musculosa motu perpetuo agitata mollissima & tenuissima exist-

D 2

erent,



## 20 DE NATURA MUSCULORUM.

erent, ne in his rigor senilis præpropere invalesceret.

Tria sunt de quibus magnopere pendent vel robur vel tenuitas filorum musculoformum, sexus nimirum, usus, et morbus. Virorum enim semper magis torosi existunt musculi, eorumque stamina crassiora sunt et robustiora, præsertim si labore valido exerceantur, quam fœminarum; et in iis, quorum glandulæ strumosa farctura distenduntur, et qui sanguinis intemperie ea quæ Rachitidi comitem se jungit laborant, non solum miram debilitatem et tenuitatem in musculorum filis reperii, multiplici cadaverum sectione doctus, verum etiam in arteriis cæterisque vasis sanguinem deferentibus tantam observavi exilitatem, ut strumarum morbum a sanguine acri vapidoque, ob deficientem vasorum vim, partim  
in

in conficiendis humoribus, partim in expurgandis recrementis, nec aliunde deducendum putem. Quam quidem sententiam five conjecturam meam confirmare videntur tum ea quæ hunc morbum præcedunt, tum ea quibus in eodem curando felicissime utuntur medici. Huic enim vitio maxime opportuni sunt ii quorum parentes vel morbis diuturnis, vel annis ingravescentibus fracti, effætam quasi genituram iis procreandis impenderunt: accedit aer crassus, urbanus, labes variolarum vel erysipelatis *Crisi* imperfecta male expurgata. Huic morbo maxime medentur ea quæ vasa roborant, quæ crassa liquant, quæ acria obtundunt, quæ corpus nutriunt.

Aliud restat de filis musculosis hic loci dicendum; notæ siquidem exponendæ sunt quibus a filis iis quæ mem-



## 22 DE NATURA MUSCULORUM.

membranam arteriarum mediam constituunt distinguere possint†, quæ a plerisque anatomicis musculosa perhibentur. Fila igitur musculosa in longitudinem distenta vim quandam sese in pristinam brevitatem contrahendi habent, quam elasticam Physici nominant, languidam vero et exiguam; contra, arteriæ tunica media et multum distendi se patitur, et distenta vim insignem sese restituendi habet. Præterea, fila musculosa membrana reticulata intersepiente in fasciculos distinctos composita videmus; in arteriis autem nulla fasciculorum distinctio reperitur. Quinetiam musculus ob arterias atque venas frequentes staminibus suis intertextas rubelli coloris est; media autem arteriæ mem-

† Arteriarum membranam mediam Ligamentosam non Musculosam Francus Nicholls Medicus Regius in Prælectionibus suis Anatomicis primus asseruit.



brana ex albo flavescit. Postremo, musculus facile coctione solvitur; arteriæ, contra, ferventi diu maceratae aut minime aut certe difficillime solvi possunt. Atque hæc de filorum musculoform natura in præsentī dicenda habui, alia de iisdem prolaturus ubi de motu musculorum erit dicendum.

Ad tendinis naturam exponendam propero, qui licet ad musculum constituendum minime sit necessarius, cum tamen vel ligamenti, vel fræni, vel capsulæ munere in corpore fungatur, atque adeo musculorum actionem vel dirigat vel terminet, minime est prætereundus.

Tendines et nervos eodem nomine veteres sæpe appellasse ex pluribus scriptorum Hippocraticorum locis constat. Has tamen partes certo discrimine

## 24 DE NATURA MUSCULORUM.

crimine eisdem disjunxisse ex ipso Hippocrate certum est, qui totum hoc genus in *τόνους, τένοντες*, et *συνδέσμους* distribuit; ita ut *τόνοις* nervos qui ab ipso Cerebro porriguntur, *τένεσι* idem quod recentiores tendines vocant, *συνδέσμοις* articulorum ligamenta designasse videtur. Galenus etiam, sed planius et apertius, tres nervorum species notis suis propriis distinguit, quarum una *Κυρίως* nervus dicitur, et vel a cerebro, vel a medulla spinali ad partes corporis sensibiles, ipsa sensu acerrimo prædita distribuitur. Altera autem, quæ nervo durior est, ex musculi fine nascitur, sensuque fere caret. Tertiam autem, quæ musculorum principia ad ossa, quin et ipsa ossa ad se invicem necit, atque adeo ligamentum dicitur, omnium nervorum durissimum, omnique sensu expertem esse ponit. Alioque loco accuratius de nervis qui a cerebro proveniunt



veniunt differens, eosdem ex triplici natura constare perhibet, media scilicet et intima arborum medullæ similima, quæ a cerebro proculdubio ortum habet: exterioribus duabus, altera quam a cerebri membrana tenui, altera quam a dura et crassa exoriri compertum est.

Tendo autem ex filis albis, splendentibus, arcte compactis, vis illius, quam elasticam recentiores vocant, expertibus conficitur. Eiusdem ope musculi a parte movenda distantes ad ipsam quasi producuntur, eique adnectuntur, tendine nimirum ligamenti vicem exhibente. Quo autem facilius vim musculi attrahentis sequatur tendo, membrana pingui reticulata involvitur: et præterea, cum ad membrum apte movendum aliquando necesse sit ut ad ossis marginem



ginem circumflectatur tendo, capsulam quandam membranaceam mucolubrico instructam tendini subjectam ossique adhærescentem in hisce locis videmus: sic enim partes inter movendum confricatæ inunguntur, atque motus tendinis reciprocans quam minimo labore fit.

Ad tendines autem, præsertim longiores et tenuiores, suis quosque locis continendos, ex eadem membrana valida et dura, ex qua tendines constant, capsulæ fiunt aptæ, quæ ossi subjecto adnexæ frænorum vice tendines coercent, ne in magnis conatibus edendis e sedibus suis exiliant: quali artificio musculorum digitos flectentium, aliorumque complurium tendines frænatos atque vinctos conspiciamus.

Alius


Alius est tendinis usus, qui in musculis biventribus dictis conspicitur. Cum enim tendo, ratione naturæ suæ duræ compactæ atque insensibilis, a frictu minus quam musculus detrimendi capiat; inter extrema carnosæ musculorum biventrium tendo interponitur, iis nempe in locis quibus musculos sibi proxime incumbentes motibus suis maxime inter se teri necesse est. Quid quod natura frugi et parca, quo minore quasi impendio musculus perficeret, tendine, qui musculo simplicior videtur, aliquando usa est. Quod quidem ex parte magna sibi proposuisse, cum Septi Transversi medium ex aponeurosi, non ex musculo fabricata est, videtur: ne scilicet ufui, cui tendo satis aptus esset, musculus frustra et sine causa præficeret.



## 28 DE NATURA MUSCULORUM.

Atque hæc de musculorum filis, et partibus, de tendinum etiam natura atque usu dicta sint. Insequente lectione de eorundem vasis, nervis, formaque varia differemus.





# D E N A T U R A M U S C U L O R U M.

## Prælectio Secunda.

**S**I quis medicos veteres atque recentiores inter se comparaverit, his medicinæ rationalis, illis Empirices palmam deferendam sentiet. Cum enim majores nostri experiundo docti quid varia alimentorum genera, quid labor, quid ea quæ e corpore excernuntur, quæque his sunt contraria in sanitate vel conservanda vel perturbanda valeant, quid denique varii motus

tus



### 30 DE NATURA MUSCULORUM.

tus animi, eorumque varium moderamen faciant, nobis explicarint; causas quidem principes quæ morbos antecedunt, quæque ad eos recta quasi ducunt satis accurate nobis exposuisse videntur. Quinetiam in altera illa medicinæ parte qua, ipsa natura duce et magistra, instructi et ornati morborum curationem aggredimur, tantam veteres diligentiam, in iis observandis, quæ ægrotantibus vel obesse vel prodesse possint, præstiterunt; tam plenam naturæ vel ferocientis, vel languentis, vel recte res suas in morbis administrantis motuum narrationem exposuere; postremo tam clare et aperte morborum tempora, et judiciorum genera, et signa, et modos scriptis suis nobis tradidere; ut nec in rebus copiam, nec in scriptoribus fidem requiratis; ordinem vero, et nexum, et *systema*, et mechanicas rationes jure profecto desideretis.

Hos

Hos antecessorum in medicina profectus contemplantes recentiores aliam sibi viam ineundam esse duxerunt ut summam artis medicæ laudem consequerentur. Ad animalium igitur corpora penitus perscrutanda, et ad partium singularum situm, nexum, fabricam, usum exponendum sese converterunt. Non quod antiquiores medicinæ antistites Anatomiam Physiologiæ veræ comitem non agnoscerent, cum de animalium fabrica tam multa, tamque præclare scripta nobis reliquerunt: cum autem a Galeno, qui (ut mihi quidem videtur) primus omnium, quorum libri ad nos pervenerunt, medicinam empiricam cum rationali feliciter conjunxit, multa quæ ad animalium fabricam pertinent prætermissa, multa obscura, nonnulla falsa prolata recentiores animad-  
ver-



vertissent; id ultimum restare, quo Physiologia omnibus numeris absoluta conderetur, visum est; ut omnia, quæ in animalibus fieri videmus, ad causas suas mechanicas referrentur, explicatis nimirum et fabrica, et actione, et fine tam universi corporis, quam partium id constituentium: accedente præterea Chymia, ut elementa corporis simplicissima, eorumque vis atque potestas cognoscerentur.

Lustrantibus autem medicis animantium corpora, variamque faciem et fabricam partium variarum contemplantibus, nihil eorum animos spe uberiore Physiologiæ exponendæ commovisse videtur quam vasa numerosissima undique in omnes corporis partes dispersa, pro variæ suæ capacitatis ratione humores crassiores aut tenuiores quosque suis usibus accom-

mo-





petit, ut cum sanguine refluo Cordi reddatur.

Quinetiam vasorum ductu, siquid a natura alienum, aut salutis inimicum, in sanguine vel sua sponte genitum fit, vel in eundem invecum, id a cæteris humoribus secretum ejicitur. Humores etiam actuosi, in quibus inest sive vis alimenta solvens, eorumque naturam in nostram naturam immutans, sive ii quibus muscoli in motum cientur, si modo eorum motus liquoris alicujus vi cieantur, sive denique ii in quibus vis genitalis existit, simili artificio a sanguine communi omnium humorum promptuario derivantur.

In has res medici recentiores intuentes veterum Physiologiam paulatim labefactare, deinde negligere, et omnia  
nia

nia fere quæcunque in corporibus animalium fiunt ad leges Hydraulicas exigere, quas etiam leges in ratione motus musculorum explicanda omnino adhibendas esse Cronius, Bernoulius, Couperus, diligentissimi in hac Physiologiæ parte exponenda viri ostendere conati sunt. At de his alius erit dicendi locus; nunc vero, cum musculus magnam partem e vasis conficiatur, nec, nisi ab humoribus horum ductu advectis et asportatis conserveatur, nec vasis destructis, voluntatis imperio moveatur, instituti ratio postulare videtur, ut de vasis musculorum quædam proferam, nempe ut quænam vasorum genera in musculis reperiantur; deinde, quibus in locis musculos ingrediantur; tertio, quemadmodum inter eorum fila dispertiantur; postremo quibus usibus inferviant anquiram.



Duo omnino vasorum genera in musculis reperiuntur, Arteriæ nimirum et Venæ, quæ rursus bifariam dividuntur, nempe in eas quæ sanguinem, et in eas quæ humores tenuiores ducunt.

Quod ad vasa sanguinem ducentia spectat, ea adeo numerosa musculis dividuntur, ut nullam corporis partem, vix Glandulas excipio, facile reperiamus cui major vis sanguinis impenditur; liquoris enim ejus quo arteriæ et venæ replentur musculus semper colorem trahit: certe colorem musculi naturalem nulli alii causæ acceptum referre possumus, quam quod in vasis sanguinem ducentibus liquor ille purpureus transluceat: nam si musculum aqua pura maceremus donec sanguis elutus fuerit, fila musculosa linteorum albedinem imitantur. Notissimum est animalium  
ju-

juniorum, agnorum nimirum et vitulorum, quibus vis in sanguine conficiendo minor est, musculos colore dilutiore rubescere : animalium præterea frigidorum, qualia sunt insecta plurima, et pisces, carnes vel pallidiores vel albæ sunt propter laticis rubri defectum. Nec ullo alio argumento quam vasorum sanguinem ducentium numero, atque adeo ipsius sanguinis ad musculum delati copię, innititur medicorum quorundam ævi superioris opinio, falsa quidem, illis tamen temporibus condonanda, omnem scilicet musculi carnem nihil esse aliud nisi istam sanguinis per intervalla filorum musculoformis fluentis portionem quæ eorum frigore concreta sistitur.

De vasis sanguinem ducentibus præterea notandum puto, ea in musculis iis, quorum motus sunt frequentissimi, et ad vitam necessarii, infig-



### 38 DE NATURA MUSCULORUM.

insigniora esse et numero et magnitudine, quam in aliis: quod quisquam sentiet vel cor vel diaphragma contemplatus, quorum arteriæ et venæ arte mediocriter repletæ mirabilem sane vasorum reptatum, ramosque longe quam in aliis musculis et insigniores et numerosiores undique filis musculosis dispertitos ostendunt.

Sanguinem in musculum ab arteriis importatum, dimisso primum in vasa arctiora quam quæ sanguinem recipere possunt humore aquosiore, reducunt venæ: de quibus hic loci dicere sufficiat eas eadem frequentia eademque fere reptatus directione qua arteriæ sociæ in musculis incedere.

Vasa autem exiliora, tum ea quæ ab arteriis sanguinem ducentibus orta humores sanguine tenuiores rivis tenui-

nuibus deducunt, tum ea quæ ab his producta venarum vice funguntur, et ex natura corporis animalis perspecta, et ex liquoribus coloratis in hæc vasa arte immixtis numerosissima esse constat : nec defunt experimenta quibus comprobatum videtur humorem illum, cujus five impulsu five stimulo motus musculorum naturalis in corpore animato cietur, a vasis illis, quæ in liquoribus tenuioribus ducendis arteriarum officium præstant, in fila musculosa deferri.

De loco quo vasa musculum ingrediuntur Anatomicos inter se dissentientes video. Veteres enim cum Galeno, tam vasa quam nervos in musculum juxta principium suum plerumque ingredi, aliquando medium, nunquam vero finem, et semper eorum ramos deorsum spargi dicunt : quod tamen secus est. Nam, ut  
omit-



omittam ea musculi extrema, quæ principii vel finis nomine insigniuntur, inter se commutari, arteriæ semper in musculos ab arteriis vicinis dimittuntur; nec refert in quam musculi partem, five originem, five finem, five medium inferantur; quod confitebitur quisquis novit musculos abdominis rectos extremis suis oppositis arterias recipere, quarum superiores a vasis Mammariis, inferiores ab Iliacis externis sanguinem suum derivant.

Neque verum est vasorum ramos in musculis semper deorsum spargi: in iis enim, quos paulo ante dixi, musculis abdominis rectis, arteriæ ab extremis oppositis sibi invicem obviam eunt.

In hac re ideo longior sum, quia in ea sententia quosdam fuisse video,  
fan-

fanciri, quasi certa naturæ lege, ut vasa et nervi in musculos juxta eorum principia ingrediantur ; et quanquam in longioribus musculis (utpote quibus, a vasis eorum principia penetrantibus, per totam suam longitudinem sanguis commode deferri nequiret) circa eorum medium vasa aliquando reperiantur immissa, ramos tamen eorum deorsum semper ferri ; atque adeo vim quandam ad musculos movendos in hac ipsa fabrica suspicati fuisse videntur. Cum revera parvi admodum momenti res sit (quod quidem in diversis musculis diversis locis vasa immittantur) qua parte musculi inferantur arteriæ, aut quali ramorum directione dispertiantur, si modo satis sanguinis idonei suppetatur ut humores propellantur, ut musculus nutriatur, ut motus, re postulante, cieatur.



Magni ergo refert, ut vasorum rami (quocunque tandem loco immittantur) ita per musculum distri- buantur, ut nullus filorum fasciculus, nullum filum musculosum debito suo humore, sive sanguine, sive lymphâ, sive alio quocunque careat.

Cui rei ut natura provideret, arteriarum ramos ita in omnes fasciculos musculosos fudit ut quisque fasciculus arteriam comitem, laterique quasi adhærentem habeat: ab arteriis autem hisce singulis dimittuntur propagines minutissimæ, quas telæ reticulatæ fasciculos singulos sibi invicem nectenti et fasciculos vestienti datas, extremis et exilissimis suis finibus in fila musculosa inferi, et cum ipsis humores suos communicare verisimile est. Frustra tamen natura vasa adeo numerosa musculorum fasciculis divisisset, nisi *Αναστομώσεις* com-  
meatu,

meatu, ut humoribus progressuris porta semper pateret prospexisset. Quo enim modo fieri potuit, quoties inter musculosos fasciculos diu, quod agente musculo sæpe fit, tumentes et rigidos arteriæ et venæ reptantes comprimerentur, ut sanguinis flumen non sisteretur; nisi vasorum inter se mutua et frequentissima conjunctione via semper esset expedita: in nulla igitur corporis parte, ne in ventriculo quidem et intestinis, arteriarum propagines tenues conjunctione frequentiore coeunt quam in musculis.

De usibus vasorum quæ numerosis suis furculis musculosos fasciculos ambiunt pauca tantum hic loci proferenda sunt: ut igitur omittam ea quæ ad sanguinis circulum et musculi conservationem spectant, submonuisse sufficiat sanguine per arterias advecto opus esse ut musculorum



#### 44 DE NATURA MUSCULORUM.

motus naturalis cieatur: siquidem, ligato vase succum illum purpureum ad quodvis membrum deferente, brevi perit vis musculorum eorum qui a vase constricto sanguinem suum derivatum habent: sed hisce in præsentī supersedebimus, ut ad nervorum in musculos distributionem, eorumque fabricam explicandam quantum nostrum institutum postulat veniamus.

Omnem nervum, portione molli septimi paris excepta, tegumento albo, splendente, valido, ejusdem naturæ cujus sunt musculorum tendines involvi oculis conspiciamus. Cum autem interiorem nervorum fabricam paulo curiosius perscrutamur, ex filorum minimorum fasciculis, quorum quisque thecam suam membranaceam habet, quique omnes communi illa valida tunica modo descripta simul concluduntur, eosdem constare reperimus.

rimus. Fila autem singula tenui involucro vestita sepiuntur, et ex natura medullosa vel ab ipsa cerebri Medulla Oblongata vel a Medulla Spinali producta constant.

Nervi una cum arteriis musculum ingrediuntur, et eodem ductu quo illi ramulos suos diffundunt, qui exiliores sensim facti tandem aciem oculorum fugiunt.

De nervorum virtute et moderate in filis musculosis tendendis et remittendis, et in humoribus propellendis, cohibendis, sistendis, omnique alio eorum munere in motu musculorum ciendo et moderando differam cum de ratione motus musculorum loquar. Ad varias musculorum formas earumque usum nos convertamus.

Musculus rectus is dicitur cujus fila musculosa ab ejus principio versus finem



finem parallela sibi invicem, recta feruntur. Quæ species musculi aptissima est motibus membrorum magnis. Cum enim filorum musculosorum sese contrahentium certa sit ratio qua musculus contractus brevior fit, exinde efficitur, ut quo longius filum musculosum sit, eo major fuerit ejusdem contractio. In musculis autem rectis fila musculosa longissima inter eorum principia et fines intercedunt.

Cum autem omnis musculorum vis movens in filis suis musculosis infit ; exinde conficitur, ut quo plura in musculo numerentur fila musculosa eo vis ejusdem major sit. Ubi igitur majore momento opus est, ibi musculus *Penniformis* adhibetur.

Musculus autem *Penniformis* is dicitur, in quo fila musculosa vel ab osse vel a ligamento exorta in oram tendinis

tendinis oblique feruntur. In his igitur musculis, propter filorum musculo-  
forum numerum, vis movendi major est, cum tamen in iisdem, propter eorundem filorum brevita-  
tem, contractio minor esse possit.

Non sum nescius cum musculo-  
rum contractionem validiorem vel de-  
biliorem pro filorum musculo-  
rum numero esse dicam, esse tamen quæ  
huic meæ sententiæ opponi possint.  
Alias nimirum esse in musculis et ro-  
boris et debilitatis causas ac filorum  
musculo-  
rum numerum, ætatem sci-  
licet, usum, vim insitam, morbum.  
Quasi negem vim musculorum mino-  
rem esse in puerulis quam in iis  
quorum ætas adolevit. Quasi negem  
musculos usu et exercitatione ro-  
borari, inertia et desidia debili-  
tari. Quasi negem majorem vim  
in musculosa Cordis vel Auricu-  
larum



larum ejus fabrica, vel etiam in musculis quibusdam Sphincteribus dictis, a natura insitam esse, quam in aliis majore fortasse filorum musculoformium numero instructis. Quasi denique negem, morbis quibusdam ingruentibus, omnes vires subito prosterni, numero filorum in musculis haudquaquam diminuto. Hoc tantum volo, ut naturæ consilium in musculis *penniformibus* fabricandis exponatur, cum in quoque filo musculo suo sua vis insit, eundem musculum in eodem homine, eadem ætate, cæteris omnibus, eo validius contrahi quo major in eo inest filorum musculoformium numerus.

Cum fila musculosa obliquo cursu incedentia utrinque in tendinis oram immittuntur, fit musculus *penniformis* duplex; quo artificio, numero filorum musculoformium aucto, augentur etiam mus-

musculi vires. Quinetiam in musculis complurimis ordines filorum musculosorum multiplices specie multiplici tendinibus affixos videmus, quorum exempla sint musculi crus extendentes, musculus Gastrocnemius et Soleus, cum multis aliis, quos hic loci nominare non est necesse.

Huic generi musculorum multiplicium adscribi possint ii quibus forma quam in memoratis minus simplex est, et qui bicipitem vel tricipitem nomine insigniuntur, quarum omnium formarum eadem est fere ratio: his siquidem omnibus fila musculosa, quandoquidem e loco angustiore oriri minime potuerunt, ex pluribus locis distantibus, commodis tamen, principia sua habent, simplicique tendini adnexa, viribus junctis partem movendam movent. Minime tamen negavero singula musculorum multi-

H                      cipitem



capitum capita singulos etiam usus præbere.

Alia est species muscutorum caudam multiplicem habentium, alia est etiam eorundem ratio. Musculi quippe hujus formæ unico principio oriundi simplicem quasi muscolum constituunt ; deinde in plures musculos, partibus diversis movendis inservientes, dispertiuntur, quorum cuique suum proprium munus est præter commune officium cui conjunctim inserviunt.

Exemplo sint musculi flexores digitorum communes, quorum ope digiti vel singulatim vel conjunctim moveantur : atque adeo flexores memorati pro musculis numero quidem diversis, quibus tamen commune est principium, revera sunt habendi.

Fila musculosa meatibus corporis certis constringendis dicata Sphincteres vocantur. Cum autem muscoli contracti vix tertia sua parte breviores fiant, ut quorundam fert opinio, de musculis Sphincteribus duplex est orta quæstio. Primum enim dubitatur an revera Sphincterum fila musculosa in orbem ferantur? Deinde quæritur quemadmodum fila in orbem ducta foramen medium possint occludere.

Quod ad primam quæstionem attinet, vix in corpore humano reperiuntur muscoli Sphincteres in orbem ducti, nisi forte ordinem internum filorum musculoformum Gulæ et Intestinorum excipiatis, illas siquidem partes ab his *σφίγγεσθαι* dicit Galenus. Musculos cæteros, quibus foramina claudere a natura datum est, vel Ellipticos vel obliquos esse reperio, qui a foraminibus claudendis paululum

H 2

distant,



distant, adipe vel alia quadam materia interposita; quocirca tam contractione sua, quam mole materiæ, quam introrsum premunt, tam obturando, quam constringendo, munere sibi dato funguntur.

Quid quod fila musculosa in orbem ducta, si modo a foramine claudendo vel minime distent, punctis etiam duobus e diametro oppositis fixa sint, si tertia sua parte breviores fiant, in ipsam diametrum incident, atque adeo foramen comprimendo claudent.

Alia videtur esse ratio qua fila musculosa Cordis sanguinem cavis ejus receptum omnem expellunt: incedunt enim cursu obliquo, eorumque longitudo ventriculorum diametros ea proportionem superat, ut cuivis pateat, illis contractis tertiaque tantum

tum sua parte brevioribus factis, fieri nullo modo posse, quin ventriculorum parietes sibi invicem apprimantur.

Mihi jam finem facturo res una et altera notanda restant, quarum prior locum in quo muscoli infiguntur, altera situm eorum generalem respicit. De prima notandum est, musculorum caudas prope articulum ossis movendi plerumque infigi, ut motus major fiat, atque ut, in membro flectendo, tendines capsulis suis artioribus facilius retineantur.

In musculis vero collocandis non solum formosæ corporis speciei diligenter prospexit natura, sed cautum est præterea ne vel pondere graviore, vel mole inhabiliore, membra minus apta muneribus suis obeundis redderentur. Si enim (ut exemplo res ex-



## 54 DE NATURA MUSCULORUM.

plicetur) musculos, quorum officium est digitos flectere, omnes in vola manus natura posuisset, manus certe ad res tractandas parum esset accommodata ; muscoli igitur principes digitis contrahendis inservientes ab osse humeri vel ulnæ exorti cubito incumbunt, tendinesque graciles demittunt articulis flectendis infigendos.

Atque hæc de musculorum vasis, nervis, et formis, proxima prælectione de motibus eorum disseram.





# DE NATURA MUSCULORUM.

## Prælectio Tertia.

**D**E musculorum materia, fabrica, variisque formis prælectionibus superioribus differui, sequitur ut de eorum motu ejusque causis (tum iis quæ ratione mechanica vique ipsius fabricæ instrumenti munere funguntur, tum de primaria, propria, efficiente, quæ causas mechanicas agit, dirigit, moderatur, dicam.

Actio



Actio musculi propria contractio a medicis appellatur, qua fila musculi carnea tumescere, rigescere, breviora fieri conspiciamus; hanc autem contractionem ita regit et moderatur principium movens (quodcunque illud tandem sit) ut exinde musculi actio validior vel debilior, celerior vel tardior, diuturnior vel brevior fiat, ea ratione quæ fini proposito aptissime respondeat.

In harum igitur rerum causis exponendis atque ad rationes mechanicas referendis varia Physici differuerunt; tam ipsorum filorum musculorum fabricam, quam causas motuum actuosas, pro suo quisque modulo fingentes. Horum sententias memoratu maxime dignas recensere haud absurdum duco; sic enim quid alii præstiterint præclari viri cognoscetis: qui si in re obscura atque difficil-

ficillima exponenda, vel perspicuitati, vel veritati minus satisfecerint, eo minor de me vestra erit expectatio.

Imprimis igitur sententiam Borellianam breviter exponemus, quæ licet quorundam aliorum de his rebus opinionibus neque tempore prior, neque verisimilitudine potior sit, cum tamen Borellius primus omnium, quantum sciam, in causis motuum animalium exponendis mathematicas rationes adhibuerit, cumque, præterea, quicquid de musculi fabrica interiore scripsere recentiores, id omne fere dogmati Borelliano nitatur, primum locum ei concedemus.

Tria sunt, secundum Borellium, ad motum musculorum necessaria. Fabrica nempe filorum musculorum apta; deinde succus nervorum



## 58 DE NATURA MUSCULORUM.

in fila musculosa voluntatis imperio instillatus; postremo, cum nervorum succus in fila musculosa instillatus musculorum contractioni efficiendæ impar sit (ut clarissimo auctori videtur) requiritur in ipsis musculis aptus humor, qui cum succo nervorum confusus effervescat, et musculosa fila inflat, distendat, breviora reddat.

Omne igitur filum musculosum ex parvis machinis sibi invicem ordine nexis constitutum ponit; nec ullum filum quaecunque, five ex metallo, five ex planta, five ex animante sit, posse distrahi et rursus contrahi censet, nisi quod ex particulis elasticis constituitur: quarum particularum formam in corporibus rigidioribus, qualia sunt annuli, vel fila metallica, arcuatam esse vult, in mollioribus et flexilibus rhomboidem.

Mus-

Musculum igitur ex filis hisce contiguis constitutum fasciculo cui-dam reticulato similem esse dicit, cujus pori rhomboides, quiescente musculo, flaccescunt; horumque parietibus inter se contingentibus, eorundem diametros rectas longiores, transversas breviores fieri: in musculorum vero contractione cavas illas machinas inflari, distendi, rigescere, secundum altitudinem breviores fieri, secundum latitudinem crassiores: quo autem id fiat, machinæ illæ vel humoris cujusdem mole ut repleantur, vel liquore quodam fermentescente ut distendantur, necesse putat.

Cum autem experientia comprobatum sit, illico perire motum si nervus, cujus rami per musculum disperguntur, vel comprimatur, vel exedatur, vel præcidatur; exinde consequi dicit succum quendam *spirituosum* et actuosum a nervis suppeditari



musculis: et præterea, cum nervorum succus, dum in ipsis continetur, nullum inflatum, vel tensionem, vel tumorem in nervis efficiat, in musculis alium succum quendam necessario inesse; qui cum spiritibus mixtus et confusus (ut in experimentis chymicis fieri videmus) effervescentia rarefiat: unde repletis distentisque omnibus musculi machinis rhomboidibus simul, totum muscolum, ictu oculi citius, intumescere, durescere, contrahi: postremo, nullum alium humorem in musculis reperiri præter sanguinem et lympham: motum igitur musculorum a sanguine et lymphâ simul cum nervorum succo confusis et fermentescentibus in machinis filorum musculosorum rhomboidibus effici. Hæc fere Borellius.

Exortus est postea Johannes Bernoulius, qui Borellii vestigiis insistens, quæ

quæ ille protulit correxisse potius, quam sua prompsisse videtur. Placuit quidem Bernoulio filorum musculoformum forma a Borellio expofita, quatenus hic ex machinis cavis sibi invicem nexis ea coagmentata esse voluit: cum tamen earum machinarum parietes ex membranis flexibilibus constituentur, atque adeo, ut Bernoulio videtur, humori cuicunque vel in ipsis existente, vel ab alio loco immisso, quoquoqueverfus necessario cedant; verifimilius esse duxit fila musculosa non ex Rhomboidibus, sed ex Ellipticis vesiculis catenatis constare, quæ liquore effervescente repletæ et distentæ ad spheræ formam accedant: et quo magis rotundam illam formam, agente musculo, vesiculæ illæ adeptæ fuerint, eo brevius filum musculosum fieri. Præterea, ne liquor idoneus desit qui vesiculas illas, jubente voluntate animantis, inflat



inflat et distendat, particulas sanguinis rotundas musculorum vesiculas intrare fingit ; ipsasque sanguinis particulas concavas, et materia quadam actuosa et elastica repletas vult ; nervos autem, qui ubique per musculosam carnem disperguntur, humorem suum proprium, animantis tanquam nutu, in vesiculas instillare ; humorem autem memoratum, ea vi quam a natura habet, pungere et destruere parietes particularum concavarum sanguinis, unde fit, ut materia elastica vinculis et carcere quasi soluta quoquo versus vesiculas musculorum inflat et repleat ; hinc totius musculi tumor, rigor, contractio.

His tamen præclarissimis viris, Borellium dico et Bernoulium, præluxisse videtur acutissimus pariter atque doctissimus noster Cronius ; qui in libello suo de ratione motus musculorum,

lorum, cum spatia certo ordine in musculis posita describat, et spiritus ordinatim dispositos in istis spatiis, omnesque, accedente aliquo impulsu, intra cancellos proprios moveri dicat; cumque ex nervis, quaquaversum in musculos distributis, animique imperio conquassatis, guttulas quasdam alius liquoris actuosi expressas, et cum humore spirituoso, quo spatia memorata turgent, effervescentes ponat; et postremo, cum ipsum sanguinem copiosius per arteriam in musculum, dum agit, deferri, et ibi propter humorem nervosum confusum æsturare et effervesce dicat; ex quibus causis musculorum formæ mutatio, atque adeo partium sibi annexarum motus sequitur; nihil sane recentioribus istis reliquisse videtur, nisi ut dicerent cujus tandem formæ spatia musculorum essent, (quam tamen ipse postea in alio libro rotundam esse sta-



#### 64 DE NATURA MUSCULORUM.

statuit) et rem ad mathematicorum normam quodam modo exigerent. Hoc tamen, quod quidem maximum est, cæteris certe præstitit, quod sanguinem ad musculos movendos animi imperio copiosiore deferri primus asseruit.

His tamen omnibus de motu musculorum differentibus propior ad veritatem Cowperus accessisse videtur, experiundo non meditando doctus. Eandem musculi fabricam quam Cronius et Bernoulius ponit: at cum multiplici observatione constisset sanguinem per arterias in musculos invectum vix minus ad eorum motus naturales posci, quam ipsum nervorum succum (si modo nervi succi alicujus ope vim suam in corpore præstent) et cum præterea experimentis suis comprobatum esset musculorum motum suscitari posse in animan-

animantibus recens macētatis immiffa per arteriam in mufculos aqua tepida; inde authori fufpicari contigit fanguinem ipfum, quatenus mole fua mufculorum cellulas implet, eorum contractionem efficere; eundemque fanguinem pondus verum effe (hifce enim verbis fere fententiam fuam Cowperus enunciat) quo mufculi moventur; et vel a fanguine cum nervorum fucco confufo et effervescente in cellulis, vel ab eodem abundante ob venas reductioni ejufdem fervientes constrictas cellulas repleri et diffendi, filaque mufculofa fecundum eorum longitudinem contrahi cenfet.

Huic tamen fententiæ, licet experimentis confirmari videatur, multa funt quæ opponi poffint. Licet enim concedamus id, quod plerique eorum qui mufculorum partes minutiffimas



## 66 DE NATURA MUSCULORUM.

microscopio adhibito oculis diligentissime lustrare negant, filum nempe musculosum ex cellulis ordine catenatis constare, minime tamen concedendum est, repletis illis cellulis, musculus plus tertia sua parte breviari posse, quod tamen motu illo intestinorum quem *περίσπαστικόν* Galenus vocat fieri certum est, si modo oculorum judicio fides habeatur. Mactatis præterea animalibus, effusoque sanguine, carnosum sub cute panniculum, usque dum calor omnis in musculis extinctus sit, motu reciproco contrahi et laxari solere, lanionibus satis motum: quin et musculis abscissis, atque a corpore remotis, similes motus reciprocos, admoto stimulo, vel solo aere musculosa fila irritante, cieri, apud omnes in confesso est. Quibus argumentis efficitur, musculos absque sanguinis impulsu contrahi posse, cellularumque distentione minime

nime fieri posse ut fila musculosa tantum brevientur quantum in motu intestinorum peristaltico eadem breviari certum est.

Minime tamen diffitendum puto motum naturalem musculorum a sanguine impulso omnino cieri, hujusque impulsus vario impetu et moderamine, variaque humoris impulsi quantitate eorundem motum intendi et remitti, celeriores et tardiores fieri: Siquidem ex fabrica musculorum exposita constat arteriarum ramos singulis musculis ita dividi, ut nullus fasciculus musculosus, nullum filum reperiatur, quod largum humoris rivum, quo irrigetur, vasculis numerosissimis deductum non habeat: Præterea, dissectis arteriis sanguinem musculo deferentibus, vis musculi sese contrahendi brevi resolvitur. Nec vere dici posse videtur, tantam vim



sanguinis ad musculum deferri, ut alatur et conservetur, non ut moveatur; cum ossa et tendines et conserventur et alantur, quibus tamen arteriæ sanguinem deferentes dantur paucissimæ: Denique, cum constet musculorum motum a stimulo quocunque cieri posse, atque idem præcipuo illo Cowperi experimento, quo, immissa in arterias mactati animalis aqua tepida, motus musculorum cessantes haud vice simplice concitavit, confirmetur; verisimile est quidem muscoli actionem non humoris alicujus aut pondere aut mole, sed ejusdem vi irritante atque stimulo cieri.

His itaque positis, in conjectura mea de causa proxima motus musculorum confirmanda ut longior sim non est necesse; nam profecto videtis, tum ex iis quæ de ductu arteriarum musculosis fasciculis a latere adhærentium,

tium, atque in fila musculosa furculos suos minimos demittentium, superiore prælectione disserui, tum ex iis quæ de motu musculi recens abscissi et a corpore remoti quovis stimulo revocabili, tum ex Cowperi experimentis, minime dubitandum esse quin partes sanguinis tenuiores in musculi locos maxime irritabiles et quasi sensiles delatas filorum musculorum contractionem ciere etiam sine distentione cellularum catenatarum posse.

Ne tamen nervi otiari videantur, quorum tamen vim maximam esse in hoc negotio concedimus, iis vasa constringendi, humoresque in musculorum locos maxime irritabiles vario impetus, quantitatis, temporis moderamine impellendi, atque adeo stimuli modum, vim, celeritatem, diu-



diuturnitatem definiendi munus tribuimus.

Neque vim nervorum sanguinem in quæcunque fere corporis loca compellendi temere a me sumi censebitis, cum ad ea animos vestros advertitis, quæ in inflammationibus, in sanguinis fluxu critico, in materiæ morbidæ a loco in locum translatione, in vasis flaccescentibus, superveniente sphacelo, fieri quotidie videmus.

Qui enim fieri possit (ut exemplis quæ dixi illustrem) in fluxu sanguinis a naribus, eo quo febres nonnullæ solvuntur, ut tanta vis sanguinis superiora petat; quod ex spiritu difficili, ex collo dolente, ex genis rubentibus, ex oculis splendentibus, ex aurium tinnitu, ex temporibus pulsantibus, ex toto capite gravi et dolente patet,  
nisi

nisi in nervis ea vis inesset arteriarum tensionem ita moderandi, ut quoque res animalis postulent, eo humorum cursus impelleretur? Quid de vario moderamine sanguinis impulsu in febris intermittens accessione dicam? in cujus principio exteriora corporis frigida, pulsus contractus et parvus, et præcordia oppressa sanguinem in corporis interiora pulsum ostendunt; cum, contra, in accessione statu facies coloratior, pulsus in carpis plenior et validior, calor auctior viam sanguinis patentiore per vasa magis æquabiliter tensa significant; postremo, in declinatione, pulsus mollior, cutis laxior, sudor erumpens, urina crassior tensionem vasorum jam remissum indicant. Unde igitur tanta tensionis variatio? Unde tam aptum motuum moderamen? Profecto si animalium corpora viribus mere mechanicis tanquam instrumenta quædam hydrau-



hydraulica moverentur, ordinem et constantiam ex necessitate mechanica in his jure expectaremus; quicquid enim mechanice, idem agit necessario; nec stabilis vasorum constitutio varias tensionis mutationes, quibus humores nunc huc, nunc illuc impellerentur, prout res animalis postularent, pateretur. Cum autem nervos a sede animæ in omnes corporis partes protensos tanquam habenas natura fabricata sit, quas vel adducat vel remittat cum velit, horum nervorum ope sic tensionem sic motum vasorum natura moderatur, ut humores in quæcunque velit loca propellat, et ea velocitate atque momento moveat quæ fini præposito maxime conveniant.

Quidni igitur iisdem nervis (quorum in œconomia animali vis tanta est ut eorum auxilio cæteras res suas  
natura

natura administret) eam etiam in musculos potestatem adscribam, ut vasorum contractione et membranarum tensione liquidiores sanguinis partes ita in musculorum stamina impellant, ut hæc, sensu quodam stimuli præcipuo commota, vi sua insita statim sese contrahant, partemque movendam moveant.

Profecto huic meæ sententiæ fidem facere videtur, quod muscoli, quo frequentius et validius moveantur, eo robustiores atque torosiores evadant: unde? nisi ab humoribus frequentius et copiosius in eorundem vasa impulsis. Quin et idem comprobatur iis, quæ et ipse in nervorum resolutionibus sæpe vidi, quæque de iisdem scriptores fide digni tradidere: in membro quippe resolutum motum musculorum, cum post vesicatorium adhibitum cuticula detraheretur, ex-

L

sus-



## 74 DE NATURA MUSCULORUM.

fuscitatum vidi, qui tamen cessabat mitescente dolore.

Nec in Historia medica defunt exempla quorundam qui longa nervorum resolutione obtorpescentes et languidi, incendio tamen subito exardescente, vel alio quodam periculo perterrefacti, majore voluntatis nisu intermissas membrorum vires recuperantes, inque pedes sese conjicientes, evasere: Quæ cum contemplor, nullam aptiorem harum rerum causam reperio, quam tonum vasorum auctiorem et vehementiorem summo voluntatis nisu sanguinem in musculos impellentem.

Haftenus de mechanica motus musculorum causa; sequitur ut de primaria, propria, efficiente dicam, postquam ea quæ Borellius differuit de duplici musculorum contractione, quarum

quarum aliam naturalem, aliam instrumentalem appellavit, vobis tradidero.

In omni musculo vis quædam *elastica* naturalis inest, qua musculus etiam post mortem aliquo modo contrahitur, et quam in iisdem præcisus videmus: siquidem musculi vulnere transverso secti partes divisæ statim diducuntur; hæc tamen vis viventibus major videtur, accedente nimirum tono vitali. Vis itaque musculorum *elastica* naturalis a motu eorum instrumentali omnino diversa est, et sejuncta: nec ii audiendi sunt, qui, hac distinctione sublata, musculos ἀνταγωνιστὰς quos vocant perpetuo quasi tetano contentos tradidere. Nec enim oris, in musculorum Resolutione ea quam Hemiplegiam græci dicunt, distorti a motu instrumentali musculorum ἀνταγωνιστῶν, ut illi volunt, causa



est petenda, sed a tono *Elastico* naturali, qui in musculis non resolutis, tensione vitali addita, certe major est.

Sed ad causam efficientem motus musculorum pergamus. Musculorum alii voluntatis imperio subjiciuntur, alii autem sunt, qui, non solum nobis non cogitantibus, sed etiam invitis, sua munia exequuntur.

De motibus voluntariis non necesse est ut dicam, cum semper nutum animi cogitantis quasi intueantur. De iis autem qui nobis invitis fiunt, non una est medicorum sententia; cum alii necessario, et mechanica quadam vi, alii ab animo cogitante, non autem advertente, alii a principio vitali, ab animo tamen cogitante diverso, eos fieri arbitrantur.

Quod ad priorum sententiam attinet; haud facile cuiquam, rem diligenter

genter perpendenti, verisimile videbitur motus quosdam hujus generis, quales sunt Cordis, ad rationem mere mechanicam posse exigi. Quicquid enim vi mechanica fit, idem fit necessario : nec motus ex tali causa pendentes inchoari, intendi, remitti, sisti, vel alio quocunque modo ita procurari possunt, ut ei fini aptentur, qui, rebus fortuito supervenientibus, alius atque alius fit. Licet enim minime negaverim machinae partes ita posse sibi invicem aptari, ut vitium ipsius, certo tempore, a certa et provisa causa superveniens, vel corrigatur, vel praecaveatur, quod quidem in horologiis fieri videmus, nullo tamen modo fieri posse puto, ut motus a caeca necessitate et ortus, et productus, rebus fortuito contingentibus accommodetur. Quod tamen in Corde fieri videmus, cujus motus, ut ex pulsu patet, nunc validior,



dior, nunc remissior, nunc tardior nunc celerior, omni denique modo varius existit, perinde ut conservatio animalis pro rebus ejus in horas mutabilibus variari postulat.

Cum igitur in animalibus talis sit motuum ratio, tale moderamen, ut a nulla alia minus quam a cæca mechanica causa proficisci videatur, cumque in animalium natura nullum prudentiæ, nullum rationis vestigium nisi in anima rationali videant, sunt, qui motus omnes, quibus res animales administrantur, ab animo rationali et institutos et temperatos arbitrantur, atque adeo voluntatis imperio, nobis utcunque non advertentibus, fieri. Nec huic eorum sententiæ, quo minus vera habeatur, obstare motus hos nobis nescientibus fieri: siquidem voluntatis imperio, animo autem non advertente, fieri di-

dicunt. Quod nemini incredibile fore putant, qui motus frequentiores usu nobis familiares perpenderit : Nictus enim oculorum conniventium, et in cithara pulsanda digitorum motus certe nutu voluntatis fiunt, nobis tamen quasi insciis, de rebus etiam aliis sæpe cogitantibus, certe ad has res, usu et consuetudine faciles, parum advertentibus.

Multum tamen interest, inter motus eos, quos usu familiares animo quasi remisso facimus, quosque, ut lubet, instituimus, moderamur, sistimus, et motus vitales ; qui adeo nullum commercium cum voluntate habent, ut non solum, ne intentissima mentis cogitatione potestatem animi rationalis in hos perspicere possimus, sed, contra, eorum plerosque nobis invitis et repugnantibus fieri agnoscamus. Quis enim mortalium actionem  
cordis



cordis internâ mentis conscientiâ non sensu et experimento doctus percepit? Quis illud imperii in motum cordis habet, ut eum vel sistere, vel concitare, vel moderari quocunque modo possit? Scio quidem pertinaci spiritus suppressione, aucto simul aeris expirandi nisu, motum sanguinis, oppresso quasi corde, interturbari posse; scio etiam in variis animi motibus, scio in ejusdem intentis cogitationibus, arteriarum pulsum varie atque subito mutari; hæc quidem, licet eorum, quæ proxime memoravi, causas me nescire confitear, expertus lubens concedo; proximum tamen in cordis motum voluntatis imperium non agnosco.

Cum igitur constet motus memoratos in animantibus certa ratione modoque administrari, neque eos tamen imperio voluntatis subjici, nec  
posse

posse eos (ut videtur) jussu animi rationalis fieri, quandoquidem animus quod ipse facit minime nescire potest; ut alia quædam vis subsit necesse est, quæ (sive animæ, sive instinctus naturalis, sive denique principii vitalis nomine insigniatur) et instrumentorum sibi subjectorum usus, et finem propositum edocta, ea quæ ad hunc consequendum maxime faciunt præstat.

At præter hos musculorum motus, quorum alii nobis invitis, alii voluntatis imperio fiunt, aliud genus ab Anatomicis propositum video. Cum enim a primo tempore natalitio usque ad extremam vitæ nostræ horam, et vigilantibus et dormientibus, advertentibus et non advertentibus nobis, alterno pectoris motu hauriatur et respiretur aer, nisi forte data occasione spiritus cohibeatur; plerique



que medicorum a causa quadam mixta, ut loqui amant, motum nunc alternum fieri tradidere, ita, ut musculi spirationi consuetæ et ordinariæ præfecti a causa quadam mechanica necessario vicibus suis quique moveantur; nisi si quando eorum vis musculis aliis, animi imperio subiectis, superetur, et coerceatur: quibus etiam musculis (eos dico qui animi nutu contrahuntur) in loco conspirantibus, thoracis motus, vis, et magnitudinis, et celeritatis ratione, varie temperari possint; ut in clamore, cantu, suspirio, gemitu, spiritu denique cohibendo. Quibus tamen, re diligenter perpenſa, minus adſentior (ut omit- tam quod hac ratione inter Thoracis motus naturales, et ejusdem convulſiones minus apte diſtingui poſſit) quia non ſatis conſtat quinam thora- cis musculi ſpirationi voluntariæ, qui- nam, contra, mechanicæ præſſantur: quia

quia motum spirationis vel celeriore  
vel tardiore pro arbitrio nostro pos-  
sumus reddere, vi sola eorum muscu-  
lorum, qui necessitate mechanica mo-  
veri perhibentur: quia in respiratione  
sponte nostra intermittenda, nullam  
musculorum contrariam contentionem  
sentio: postremo, quia intermissa  
spiratione nutu voluntatis, motus  
etiam Septi Transversi cessat, quod  
tamen inter spirationis musculos vo-  
luntati non subiectos numeratur.  
Quæ cum ita sint, parum abest quin  
spirandi motus imperio voluntatis om-  
nino geri credam, quorum tamen  
motuum, ut aliorum etiam complu-  
rium, quibus multum consuescimus,  
si minus conscii nobismetipsis sæpe  
videamur, id omne huic tribuendum  
est, quod ad illos parum animos adver-  
timus. Multum certe interest inter  
hos, quibus omnino moderari pro  
nostro arbitrio a natura nobis conce-  
ditur,



## 84 DE NATURA MUSCULORUM.

ditur, et quorum, si modo animum advertamus, semper conscii sumus; et inter cordis arteriarumque motus, in quos nullum voluntatis imperium habemus, et quorum omnium omnes nescii sumus, nisi si quos forte disciplina medica, sensus externi, et experientia, non interna mentis conscientia docuit.

Habetis, Auditores doctissimi, de causis motus musculorum conjecturas meas, in quibus proferendis id mihi curæ erat, ut ea dicerem, quæ visis veris et experimentis confirmata viderentur. Multa quidem explicanda restant, maxime vero vita illa musculis propria qua, etiam, abscissi et a corpore animato sejuncti stimulum admotum aliquandiu se sentire contractione sua significant. Hujus vitæ causas, summa naturæ caligine pressas, studiis futuris Physicorum aliquando  
in

in lucem prolatas iri sperandum magis an optandum dicam? Omnes certe qui post nostrum Glissonium, hanc rem experimentis illustrare conati sunt, cum eo tantum collineaverint ut musculos præ omnibus aliis corporis animati partibus, adhibito irritamento, ad motum reciprocum incitari posse confirmarent, id tantum effecisse puto ut in re non dubia testibus non necessariis usi videantur.

*F I N. I S.*

